

Date – 17/03/2025

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. **BJP Mizoram State President Pu Vanlalhmuakan Mizo mipuite mamawhna hrethiam taka Assam Rifle ram luah mipui hnena hlan let a ni ta chu India hmarchhak hmasawnna hmahruai a ni, a ti.**
2. **Aizawl Mayor Pu Lalrinenga Sailo chuan Aizawl Treasury Bazar chu mipui him zawk nan leh Mizoram hmun pawimawh Assembly House awmna bul hnai anih avangin hmun him zawka sAWN ani dawn tih a sawi.**
3. **Prime Minister Narendra Modia leh New Zealand Prime Minister Christopher Luxon te vawiin khan New Delhi-ah an inkawm.**
4. **Union Railway Minister Ashwini Vaishnaw chuan kum 10 kalta chhungin Railway Ministry chuan hna thar nuai 5 chuang an siam tih a sawi.**

<><><>

### BJP MIZORAM PRESS MEET

**BJP Mizoram State President Pu Vanlalhmuakan Mizo mipuite mamawhna hrethiam taka Assam Rifle ram luah mipui hnena hlan let a ni ta chu India hmarchhak hmasawnna hmahruai a ni, a ti**

He thu hi vawiina Mizoram BJP Office a chanchinbu mite an kawmnaah sawiin Pu Vanlalhmuaka chuan Assam Rifle in Kum 1890 atanga alo luah tawh Mizoram mipui tana hlanna hun Union Home Minister Pu Amit Shah an a hmanpui leh Mizoram mipui te lawmpuina chibai bukna a hlan chu BJP Mizoram Pradesh chuan lawmawm a ti a. Prime Minister Narendra Modi an Mizoram khawpui Aizawl chu mipui te tan hmun awl tlem tawh tak a nihna hrethiam a, Mizo mipui te beiseina tihhlawhtlin sak a Assam Rifle hmun, mipui tana hlan let chu a duhdan a ni a ti.

BJP Mizoram chuan ram inhlans let tak hi Mizoram khawpui ti nuam zualtu ni ngei tura hman tangkai a nih theih nan state Sorkar an beisei thu leh Mizoram tan a tul apiangah thawhpui chu Mizoram BJP chu a inpeih reng a ni a ti a. Union Home Minister in Mizoram tan a hmasawnna hnathawhna tur vbc. 5842 lai pek anih tur thu a sawi thu sawiin, Hmarchhak state a ngaihpawimawh vangin Prime Minister chuan vawi 78 lai a tlawh tawh a ni a ti.

BJP MLA pahnih Pu Beichhua leh Pu Hrahmo bakah MADC leh CADC CEM leh Party hruaitu ten Raj Bhavan ah Pu Amit Shah an hmuh thu sawiin, Lengpui Airport chei that a tul thu an thlen a, CM Pu Lalduhoma hnena thurawn alo pek tawh angin Airport hmasawn nan Airport Authority of India

(AAI) in a tul anga cheithat hna thawk tura ngenna ziak a thlen a ni a ti a. ADC pathum ten 125th Constitution Amendment bill 2019 a tak a hman thuai a nih theih nan ziakin ngenna an thlen a. MADC tana Special package pe thuai tur leh CADC area hmasawn na atana 16th FC Chairman hnena thlen tawh tih hlawhtlin a nih ngei theih nana hma la turin Union Home Minister hnen ah thehluh a ni a ti.

<><><>

## HOME MINISTER

Home Minister Pu K Sapdangan sorkar laipui atangin raltnante tanpuina dawn chu district tina DC te kaltlangin hman thin a ni a ti a, sorkar laipuiin raltnante tana buhfai a pek te chu a dawng tur ten an dawng kim tawha a hriat thu House a hrilh bawk.

Pu K. Sapdanga chuan sorkar laipui puihna bakah hian Mizoram sorkar chuan ama pualin raltnan te chhawmdawlna tur chu district tina DC te leh SP te kaltlangin a pek thin thu a sawi a, Raltnan zingah in leh lo chana khawngaihthlak tak tak an awm rualin, harsatna siam tam tak an awm chu Mizoram sorkar chuan a hria tih sawiin fimkhur takin enkawl dan tur a ngaihtuah mek a ti a, high level committee on indigenous displaced people din niin vawi 2 an thukhawm tawh a, hemi hnuaiah hian district hrang hranga raltnante harsatna zirchiangtu tur committee peng siam a ni tih a sawi bawk.

Mizorama raltnan awm zat an chhiar hnuhnun berah Myanmar atanga raltnan sing 3, sang 3505, Manipur atangin sang 2633, leh Bangladesh atangin sang 2217, an vaiin raltnan sing 4, sang 1355 vel Mizoramah an awm mek a ti a, a awm zat tak sawi dik thlap a har tih sawiin ramri chu ven ni mah se hmun thenkhatah awlsam taka luh theihna a awm avangin raltnan zat chu a danglam thei nasa hle a ti a, Mizoramah raltnan te leh sumdawng te nen lut an inpawlh avangin an zat chiah hriat a harsat thu a sawi.

<><><>

## FIRE

Aizawl Mayor Pu Lalrinenga Sailo chuan Aizawl Treasury Bazar chu mipui him zawk nan leh Mizoram hmun pawimawh Assembly House awmna bul hnai anih avangin hmun him zawka sawn ani dawn tih a sawi.

Vaiiina Aizawl Treasury Bazar kang a tlawhna ah he thu hi sawiin Pu Lalrinenga Sailo chuan Aizawl Treasury Bazar ah chuan chhiatna hrang hrang alo thleng tawh thin a ti a, a bula chengte tan tun dinhmunah a him tawkloh avangin helaia bazar insawnna tur Tuikual venga AMC Complex ah ruahman ani a ti a, Aizawl Treasury bazar chu a him zawk nan tun dinhmunah mipui tana tlawh pawh theihloh turin ruahmanna an siam tih a sawi.

Aizawl Police OC Pu Lalnunmawia chuan kangmei chu tukin dar 3 vela chhuak a ni a ti a, Foresic hovin evidence an lak atangin a kan chhan an hriat theih a beisei tih sawiin hmalak mek ani tih sawi.

Hetihlai hian Aizawl Treasury Bazar Association President Pu HL Chhingpuia chuan AMC in an awmna hmun sown an tumna ah ei hmuh zawh an inring lo a ti a, an thuthmun Treasury ami chu sown lo turin sawrkar an

ngen dawn tih sawiin an eizawnna innghahna ber anih avangin sawrkarin ngaihsak se an duh thu an sawi bawk.

Aizawl Treasury Bazar kangah hian thil a kang chhe nual a, building chung bera PAMRA Office, Asam type bungrua leh thil pawimawh kangin a bula I&PR Office darthlalang pawh a keh nasa hle a ni.

<><><>

## WORLD CONSUMER RIGHTS DAY

World Consumer Rights Day, 2025 chu Food, Civil Supplies & Consumer Affairs Department bul tumin vawiin khan Aizawl Vanapa Hall-ah hman a ni a. He hun hi, Food, Civil Supplies & Consumer Affairs Minister Pu B. Lalchhanzovan a hmanpui a, Aizawl Municipal Area chhunga LPG Home Delivery kalpui puitling thei hmasa ber leh awm chhun M/S Zothan Indane, Luangmuar, Aizawl te hnenah excellent performance in LPG Home Delivery Award a hlan nghal a ni.

He hunah hian Minister Pu B. Lalchhanzova chuan kalkhawmte hmaah thusawiin, consumer-te dikna chanvo zau zawka inrhilhriatna atan chuan social media hman tangkai thiam chu a pawimawh hle tih a sawi a. Hmasawnna ngelng het a lo awm theihna tur atan pawha consumer right chu thil pawimawh ber pawl a nih thu a tarlang a, khawvel chu insumdawn tawnna hmanga kal a nih avangin Sumdawngte le anmahni dawrtute karah khi engmah awm lo va inring tawn leh dik taka an kalho tlan a pawimawh zawk ziate a sawi a ni.

<><><>

## LADC

Lai Autonomous District Council a ZPM Sorkar, Chief Executive Member Pu V.Zirsanga kaihruaia Executive Member pakuate chu vawiin khan Lawngtlai DC, Pu Cheemala Siva Gopal Reddy an rinawmna thu tiamtirin Executive Member atan a lalut.

Executive Member lakluhnna inkhawm, LADC Hall, Lawngtlai a neih hi LADC a Executive Secretary Pu K.Lalthanzara'n kaihruaiin, Lawngtlai DC Pu Cheemala Siva Gopal Reddy chuan Executive Member atan a ruat, Governor in a pawmpui mi pakua, Pu Manghmunga Chinzah, Pu K.Hrekung, Pu Lallawmsanga Apetow, Pu LR. Dingliana Chinzah, Pu T. Lalengmuana, Pu V. Zathanga, Pu CL. Lianzuala, Pu BN. Thangpuia leh Pu L. Lalhmachhuana te chu rinawmna thu tiamtirin a lalut a ni.

He hunah hian Chief Executive Member Pu V.Zirsanga chuan CEM leh Executive Member te hna chanpualt tur a puang nghal a, ZPM Legislature Party a mi, Executive Member ni velo, Pu N.Zangura chu Adviser to CEM atan ruat a nih thu leh Pu Tuturu Singh chu Deputy Chief Whip atan ruat a nih thu a puang.

Pu V.Zirsanga chuan LADC a ZPM Sorkar chu Kalphungthar in a kaldawn tih sawiin, thilhalo paihin, thiltha zawk ni a langte chu ram mipui tan kalpui an tum tih a sawi a, LADC ah ZPM Sorkarna a pianchhoh nan harsatna tamtak an hmachhawn a, ram tana thatur ah chuan theihtawp an chhuahzel ang a ti a, mipuite chu LADC Sorkar tan tawngtai uar turin a sawm a ni.

<><><>

## AIR NEWS ON SOCIAL MEDIA

**Chanchinhar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinhar hi ngaihthlak leh chhiar theih a dah a ni.**

**Naktuk zing dar 7 leh a chanve-ah Chanchinhar hi puan leh a ni ang.**

<><><>

## PM

Prime Minister Narendra Modia leh New Zealand Prime Minister Christopher Luxon te vawiin khan New Delhi-ah an inkawm. Ram hruaitu pahnihte hian ralthuam, zirna, infiamna, Horticulture leh Forestry lamahte thawhdunna ziah an remti a. Eibar zawnna kawnga hmalaknate inhriatpuitawn an remti bawk a ni.

Thuchhuah a siamah Prime Minister Narendra Modia chuan India leh New Zealand inkara thil pawimawhte zau taka an sawidun thu sawiin abik takin ralthuam leh venhimna lamah thawhdunna tihngheh an rel tih a sawi a ni.

(Byte)

**Prime Minister Modia chuan India leh New Zealand te chuan firfiakte do turin an thawkdun chhunzawm dawn tih a sawi a ni.**

<><><>

## UNION RAILWAY MINISTER

Union Railway Minister Ashwini Vaishnav chuan kum 10 kalta chhungin Railway Ministry chuan hna thar nuai 5 chuang an siam tih a sawi a. Vawiina Rajya Sabha-a zawhna chhangin Union Minister chuan rel chetsualna pawh a thleng tlem sawt hle tih a sawi a. Sawrkar laipui chuan rel lama hmasawnna ruhrel siam tha turin theihtawp a chhuah thu leh khualzinte tana nuam leh man tlawm taka an zin theih nan hmasawnna tam tak siam a ni a ti bawk.

Pu Vaishnav chuan kum 2020 hnuah rel chuan man an la tisang lo tih sawiin ram thenawmte nena khaikhin chuan a tlawm hle a ni a ti a. Railway sum dinhmun pawh a tha chho mek tih sawiin sawrkarin tun aia changtlung zawka siam turin theihtawp a chhuah zel thu a sawi a ni.

<><><>